



Gutpela Wasman

No 3/2017

**Jisas Krai i tok,
“Mi gutpela wasman
bilong sipsip.”**

Jon 10.11

Tok tru na tok yes o nogat em inap!

NAU BAI YUMI HARIM 3-PELA STORI LONG KANTRI AMERIKA

1. Senisim tok tru i kamap tok giaman

Liklik boi Pita i save stap wantaim mama bilong en. Wangepela meri i save stap klostu long haus bilong em. Wangepela taim Pita i tokim dispela meri olsem, “Mama bilong mi i sik, tasol mi prea pinis na askim God long oraitim sik bilong em.” Dispela meri i tok olsem, “Pita, mama bilong yu em i no sik. Nogat wangepela man i save sik tru tru. Ol i save tingting tasol olsem



ol i sik. Na tu nogat wangepela man i save dai.” “Jisas i bin dai,” Pita i tok. Tasol meri i tok gen, “Jisas i no bin dai. Nogat wangepela man i save dai. Nogat, ol i save senis na kamap narapela man gen na stap laip i go yet. Hia mi gat wangepela buk bilong mama bilong yu i ken rit na buk bai i tokim em olsem, em i nogat sik.”

Pita i bekim tok bilong meri olsem, “Em orait, mi bai kisim dispela buk bilong yu i go givim long mama bilong mi. Tasol mi save, em sik, na tu mi save tru tru olsem Jisas i bin dai. Em i bin dai bilong baim bek mi na bilong pinisim strong bilong sin i save wok long laip bilong mi. Em i bin kirap bek long matmat na nau em i stap laip.” Bihain Pita i go bek gen long haus na tokim mama bilong em long olgeta tok bilong dispela meri na i givim buk long mama. Nau mama i lukluk long Pita na i tokim em olsem, “Ol dispela manmeri i save tok long stap gut tasol, ol i no

save bilip long Baibel. Ol i save bilip long ol kain kain buk i save senisim Tok Tru Bilong God i kamap tok giaman.” “Mama, mi save pinis long dispela meri, toktok bilong em na pasin bilong em i no gutpela.”

Mama i tok. “Pita, mi amamas, yu save pinis long ol dispela kain lain na pasin bilong ol.” Mama i tok moa olsem, “Yumi bai giaman na paulim yumi yet gut tru sapos yumi senisim tok tru bilong God na bilip long wanpela tok giaman. Narapela tok piksa i olsem. Em i no gutpela liklik tu sapos wanpela man i senisim balus bilong en na kisim 2-pela mabol tasol. Olsem tasol, tambu tru long senisim Tok Tru bilong God long wanpela liklik tok giaman.”

Pita em i bilip long Tok Tru bilong God. Tasol dispela meri i bilip long ol kain kain buk i senisim Tok Tru i kamap wanpela tok giaman. Pita i autim bilip bilong em long dispela meri na bihain em i tokim mama bilong em long olgeta kranki tok bilong dispela meri. Mama i amamas long bilip bilong Pita na i tokaut kliia moa long yumi no ken senisim Tok Tru i kamap wanpela giaman tok. God i ken helpim yumi long yumi no ken senisim Tok Tru i go kamap wanpela tok giaman. Tu God i ken opim ai bilong ol manmeri husat i save bilipim ol tok giaman i ken save long Tok Tru. Bilip long Jisas na kisim nupela laip bilong stap gut oltaim oltaim.

2. Tok tru tasol

Wanpela tisa bilong Kristen Skul i askim ol pikinini long klas bilong em olsem, “Giaman em wanem samting?” Ol pikinini



i tingting yet na Matin i putim han i go antap na tok olsem, “Giaman em i samting i no tru.” Tisa i askim Matin gen olsem, “Kain samting olsem, doli doli o wanpela tok piksa em giaman, a?” Matin i tok, “No tisa, em i no wanpela giaman. Giaman e-e-em, mi no save.” “Giaman em wanem samting tru?” Tisa i askim ol gen na lukluk raun long olgeta pikinini long klas. Edi i putim han i go antap na tok olsem, “Taim yu laik long trikim na i hatim bel bilong arapela man, em wanpela giaman.”

Nau Kati i putim han na i tok olsem, “Sapos mi tok, ‘Mi bai kam long hap nau yet!’” tasol tru tru mi no ting long go, em wanpela giaman.” Jeni long kona i putim han na i tok olsem, “Sapos yu tok olsem, samting yu laik salim em i gutpela tru, tasol yu yet save pinis em i no gutpela. Em i wanpela giaman.” Alan i putim han na i tok olsem, “Sapos yu tok, Jim i bin mekim wanpela tok giaman na yu ting em tru, tasol em i no tru. Em wanpela giaman.” Nau Ted tu i putim han i go antap na i tok olsem, “Olgeta manmeri i ken go long heven na ol i no nidim Jisas long sevim ol. Ating em wanpela bikpela giaman i winim olgeta arapela giaman.” Orait tisa i tokim ol olsem, “Gutpela tru, olgeta ansa bilong yupela em i stret. Nau yumi lukim kliia olsem giaman i save mekim arapela manmeri i pilim nogut na bel hevi taim yumi no tok tru. Tisa i tok moa

olsem, “God i tok long Baibel olsem, ‘Yupela wan wan i no ken giamanim ol arapela Kristen, long wanem, yupela i rausim pinis olgeta pasin bilong olupela bel’ (Kolosi 3.9). No ken giaman long

wanpela na arapela. Bilong wanem yupela i no laik giaman?"

Olgeta pikinini i save long dispela ansa, olsem na olgeta i putim han i go antap na Jon tasol i tok olsem, "Mipela i bilong Jisas na mipela i laik stap wankain olsem em. Jisas i no save giaman." Tisa tu i sapatim tok na i tok olsem, "Bikos yumi long laikim Jisas tasol, yumi no laik hatim bel na givim bel hevi long ol arapela manmeri."

Tok giaman i save givim bel hevi na kamapim hevi namel long ol manmeri. Baibel i tok long Kolosi 3.9, "Yupela wan wan i no ken giamanim ol arapela Kristen ... God i no laikim olgeta kain pasin giaman." Jon 8.44 i tok, "Satan em i man bilong tok giaman na em i papa tru bilong pasin bilong tok giaman." Tasol Jon 14.6 i tok, Jisas em yet i rot, As bilong Tok Tru na Laip. Yumi Kristen i mas lukaut na stap longwe long olgeta kain tok na pasin giaman. Yumi ken kamap wok boi bilong Tok Tru na kisim laip i stap gut oltaim oltaim.

3. Tok yes o nogat em inap

Stori bilong tupela boi Bili na Joe. Wanpela taim Joe i kam isi tasol na kisim nupela baisikol bilong Bili. Joe i toktok isi long em yet olsem, "Mi bai traिम ronim liklik taim tasol na bringim hariap i kam bek gen. Sapos mi no bringim i kam bek gen, mi promis olsem bai mi dai." Bili yet i bin sanap klostu

na harim ol tok bilong Joe pinis. "Joe," Bili i singaut na tok olsem, "Taim yu promis long bringim samting i kam bek gen, mipela i bilipim yu. Yu no inap promisim dai long laip bilong yu na tok long dai."

"Em rong long mi tok olsem, a?" Joe i askim Bili. Joe i save pinis olsem Bili i no amamas long dispela kain tok. Bili i tokim Joe olsem, "Nau yu laik long harim wanem Jisas i tok long dispela kain tok?" Joe i tok, "Yes mi laik harim." Bili i rausim liklik Nupela Testamen Baibel long poket bilong em na opim long Matyu 5.37 na i ritim. Bihain Bili i tokim Joe olsem, "Yu lukim, bipo ol manmeri i save kolim heven na Jerusalem bilong strongim tok bilong ol, tasol nau Jisas i tok, yu no ken mekim olsem. Yu mas tok yes, o nogat, em inap. Sapos ol manmeri i no bilipim yu taim yu tok yes tasol, ol tu bai i no inap bilipim yu taim yu tok yes na kolim narapela samting tu bilong strongim tok yes bilong yu. Bikpela Jisas bilong yumi i no laikim yumi kolim narapela samting bilong strongim tok bilong yumi. Olsem na yumi no ken lusim tingting long tok bilong Jisas. Yu no ken tok tru antap bilong strongim tok bilong yu. Larim wanem yu tok i mas yes o nogat na em inap. Nogut yumi no tingting gut na kolim nem bilong Bikpela long strongim tok bilong yumi."

Yumi Kristen i ken lukaut na bihainim gut ol tok bilong Baibel olsem Matyu 5.34-37 i tok. Yupela i no ken tok tru antap na kolim heven o graun o Jerusalem o holim het gras bilong strongim tok bilong yumi. Nogat. Yumi mas tok Yes o Nogat, em inap. Ol tok na eksen bihain long tok yes o nogat em ol tok Satan yet i kamapim.




TRAIM SAVE

Ritim gut 3-pela stori na kwesten na bihain yu sekolim wanem ansa yu ting em i stret.

- Husat i bilip long Tok Tru bilong God?
a) Bili b) Meri c) Joe d) Pita
- Yumi no ken senisim
a) Tok bilong man b) Tok giaman c) Tok Tru i kamap giaman
d) Sampela tok i kamap tru
- Yu bin giamanim wanpela pikinini pinis o nogat?
a) b) c)
- Bai yu mekim wanem sapos yu bin giamanim em pinis?
a) b) c)
- Husat i go na kisim baisikol bilong husat?
a) Bili i kisim bilong Joe b) Joe i kisim bilong Bili
c) Joe i kisim bilong Pita
- Wanem Baibel ves i tokaut long yumi mas tok yes o nogat em inap?
a) Matyu 5.8 b) Matyu 5.37 c) Jon 8.44

Yupela i mas tok 'Yes' na 'Nogat' tasol.
Em inap. Tok ol i save skruim long dispela,
em ol tok Satan yet i kamapim."
Matyu 5.37

Gutpela Wasman stori i kam long buk "More Little Visits With God." Translated by GUWA Team.



Published and printed by:
Publications Department
Evangelical Brotherhood Church (Inc.)
P.O. Box 996, Lae 411, Papua New Guinea

No 3/2017